

皇清文穎續編

皇清文穎續編卷五十四

詩

樂府

聖駕南巡樂府十六章

金甌

大號溟矣翕河底瀛勤勞

帝躬愉澤庶情

帝居辰極萬方察聽

惠我東南三

省厥耕

惠之篤哉四

巡於今民曰久哉於今三年

一章

申命牧伯無擾吏民簡我興衛示以儉勤

駕龍秋秋

翠華紛員雲景動曦萬物靜因因天之時作

帝之則軌於舊章有加新澤

二章

青陽權輿

祈穀上辛翼日旦旦

天行星陳瑜象載兮翳鳳凰奉

聖母兮御金根月重輪以舒華春湛湛以曠暕周流
視聽

仁壽敦豐年穰穰

錫萬民

三章

輶燕趙

臨齊魯所過郡縣

賜復田土

膏澤滂潤蠲削逋簿庶官有司逮於士伍黃鮪之民
咸荷

賚予

帝幸江南北東歌舞我其豫哉先受休祐

四章

淮之陽礲者腴淮之陰豐厥閭生之教之民樂胥蕃
釐宵衆神所娛名山軸轉崑崙崑崙虛南風吹萬物專與

天光四照咸昭蘇

五章

遂凌大江

御龍造舟中流澹淡玉山高浮金枝翠旌涵景上頭
俯鑑在宥道虛知周日升月恒穆清與侔嘒嘒江國
唯爾民是求

六章

七星南指五車氣聚八風翕闢三江委輸襟帶名都
儀鸞翔駐岡阿媚茲草木娟嬋書陳文命金庭玉柱
勤民則同豈曰遊豫

七章

自吳而越東並海門龕赭上漱靈潮激噴日母頽洞

月波瀾漫

帝功砥屬斯焉臨觀虹塘陂陀木石下捷亘以三重

六鼇脅駢

神謨永奠海若靜瀾唯

帝之勤庇我兆民

八章

湖山窈窕白賁錦章天雨汎灑天花萃芳

堯心孔性愴今不忘江海重潤羲娥引長藹藹興頌

宜介

壽康自初受

福歲在重光

春暉四被萬年是常

九章

御舟浙旋達乎京江西指金陵鬱哉大邦六朝巨麗
天闕拱雙豈不在德龍馴虎降四施配藜咸秩信在
歸仁蕩蕩容保駿龐

十章

彭城首大河汴泗交其角呂梁百步洪赤日駭飛雹
其委挾長淮兩勅敵清濁

濬哲此周防涓澮更商摧疇咨屢

躬親謨定示掌握馮嶠秉䟽寫庚辰罷守捉坐見黃

河清帆轉望東嶽

十一章

禮山川兮徧百神記功宗兮修明禋

龍光兮盼蠻和四塞兮下上習爽兮昭融

覃閭澤兮膏壤旁臚兮無垠成民功兮

德之廣

十二章

詔幸南邦

恩施已先除其逋賊百四十萬

乘輿莅止盡

賜無算所

蹕又復免所過半匪私我人民歌且勸乃宥庶甯

滌獄岸

天陽熙熙萬物潔盥自我

皇之臨唯我民之問

天子是近以解我之愠

十三章

帝問百年三老五更秀眉靦齒賡歌太平永

錫爾類子孫是承烝哉庶士學校既增亦有髦俊載
率其英江淮以南薪樵蕃興人文之觀禮樂化成
十章

聖人鏡六合仰觀昭大文天稷下地脈言滿如春溫
黃鐘同律呂百昌知本根請頒

堯舜典光天垂卿雲

魏功既富有

文德方日新

十五章

六龍迴馭天清和長麗前挾羣鸞歌年年望

幸江之涯四

巡今歲

恩尤加

皇路蕩蕩平無頗蘭橈桂楫綠漲河間

安安輦福祉多

明堂受釐瑤玉珂千篇奏

御鏗鯨鼉

小臣

無能擬正葩頤陳般頌雅卷阿敷宣

聖德摹

光華

十六章

聖駕四巡江浙樂府十六章

謹序

梁國治

皇帝三十年春正月壬戌

南巡守濟河逾江至於浙濱昭明上下允答

天人行慶布和百禮具舉先是江淮之介兩浙之陬

期頤耆老纓綬羣生延頸企踵北望而稱曰蓋

聞天以健行不息故丕憐六合焉日以久照無
私故普燭羣物焉我

皇上握乾綱提坤元

仁與天乎等量

德與地乎基厚昭章雲日開闔宇宙維我南土爰度
爰究人涵泳乎膏澤士歌頌乎

德茂昔歲辛未

皇帝肇巡稽虞典景

前型則乾運秉天經濡之以露渥表之以風聲漸之
摩之以仁義之澤厭之飫之以道德之精越歲

丁丑

鸞車載苙水媚山暉淵旋雲被洋溢太和調斟元
氣醲化豐於澍雨之膏

鴻恩暢於江河之沛洎歲壬午三勤

帝車歡聲騰天康謠溢衢前歌後舞雷動雲趨浩乎
瀛海之波而羣流歸赴穆乎春風之至而萬卉

華敷蓋所以敬

天命法

祖制省官方勤民事且夫業隆三五者徵悠遠之德
功建天地者綿必世之仁我

皇上至仁如天睿知如神肇千萬載之鴻業闢二萬
里之幅幘太平之基彌鞏中天之象維新日月
五緯珠聯璧合章符元日朗耀垂文

皇帝謙讓而未遑也禕夫

寶命景煥

天庥炳彰

聖母皇太后七十萬壽純熙大介福洪乎姬妣盛邁
乎黃唐洵千載而一時生民未有之隆際也自
壬午之春以迄於茲蓋又三年方今萬國時雍
天人一氣中外一家嘉休翔洽懷淳醞和血氣之屬
齒髮之倫含甘吮滋髓浹肌淪莫不奔走懽附
婆娑謳吟喁喁熙熙望

翠華之臻焉而邦之岳牧守臣貢情通懷敬表以

聞

皇帝曰俞哉惟

上天眷佑俾海宇和壹民物咸熙惟

慈嘏錫羨億萬年有慶予一人敬承

天之秩祐且溝洫盡力夏后之德允猶翕河時周之

命也在昔三巡躬履河淮宣防濬洩兆人子來

金隄輦於磐石玉粒茁於汙萊詩不云乎通求

厥寧適觀厥成予其觀厥成哉乃

申大號

發德音月維春正日次上辛會同之儀有繹

祈年之典居歆千乘萬騎天行星陳於是

乘輿恭奉

大安臨廣路啟天門溥覽四郊觀於近縣名城屹峙

平原壇曼高下參差龍鱗照爛柳含稊而風柔

麥鋪青而雪睨水漾淥而斯紛山雲蒸而霞絢

燕疆趙域魯界齊封黃河地紀泰岱天東虞巡
二月乾元六龍垂發生於青帝宣和令於王風
皇帝乃省耕桑於列邑課慶賞於羣工茫茫淇澤控
引淮河泱泱決滸注海騰波長隄虹亘密石駢
羅坻鄂鱗次揭孽交加障淇漣於斷岸永砥柱
於旋渦錢塘龕赭毆沮葩華蕩雲浴日磐岸影
沙依崖甃石瀦水方槎洪濤安宅斥鹵桑麻此
宸謀所經始勸九敘於維歌也昀昀禹甸淮海維揚

襟吳帶楚達於餘杭飛雲蓋海接軸連航通甌
引越穿峽浮湘閭閻闢溢廛市縱橫交貿雲集
都人樂康膏田倍獲紅朽盈倉此

皇仁所生聚滋品彙於繁昌也江山炳英俊又斯章

羽儀

帝載觀

國之光皤皤黃髮

詔祿於鄉藹藹多士亦集爰翔矢來遊於伴奭詠儀

鳳於高岡此

聖慈所樂育宏陶化於思皇也春日遲遲倉庚喈喈
歌衢擊壤黃髮背台提攜童稚奔走偕來鳥鳴
嚶而舊哢草扶

輦而新茲此不知而順則歌

聖德於安懷也崇山列岳吞江納湖仙臺真字丹青
秘圖坤元之靈府富媪之神區左思之所未賦
桑欽之所未書莫不炳乾文於

睿藻呈地寶於珍符於是

聖上觀萬姓之協和樂淳化之充溢物殷阜於時風

景舒長於化日懿

聖母之延釐肇

天人之慶悅伊蹈舞而詠歌彌六合而爲一爾乃敷

皇極申

天庥揚景鑠鋪

鴻猷懷柔河嶽秩祀咸修增爵賜祓選材造士之文

恩覃於渙汗蠲租賜帛旨災肆宥之典

澤涌於泉流噓枯潤涸顯微燭幽聲名盈於天際和
氣溢於寰州

時巡之儀究

錫類之仁周使百姓各恬熙而自得鼓舞而優游

臣

奉職江左獲從

清蹕伏覩

皇上體元則大

孝治光華上有巍巍蕩蕩天地同流之慶下有熙熙
皞皞民無能名之盛不勝踴躍忭舞伏擬撰樂
府十六首敬獻

行幄以附衢歌之義云

聖人出第一

聖人出宣中和秩天地道嶽河御六飛龍叅兩儀

武烈舞

文德歌天聲威朔漠

駿業耀巍峩

聖仁沛含四海胥樂壽媚

天子億萬年今伊始

天行第二

天行日月星次舍有恒經地行江與河萬里流洪波
聖皇御世世壽昌八紘九海開梯航天時清泰照以
陽

龍輶曉駕卿雲翔

金根羽葆扶燁煌

天儀孝奏章三光勤民時舉法

祖行篤哉純祐綏萬方

江南思第三

春風吹草綠春雨入波新
鳴情向春日知有江南人
時巡昔三舉萬象含元淳
鼓舞造化力中天轉洪鈞
安得葵藿心重照扶桑輪
謳吟三載遙聲遠

天應聞一唱江南思再唱
江南春春風動地來溥暢

如天仁

濟黃河第四

黃河天北塹萬里入淮徐洪湖扼其衝羣川以宗都
天臨紆昔睠浩蕩

宸猷鋪金隄隱如山固護民室廬宣閉得成算出帑
千萬餘

帝曰念前功屢省無辭劬旣陂亦旣宅則壤沮洳區
似聞

典謨訓艱鮮永無虞

臨高臺第五

臨高臺穆以軒下有江水清且漣春林茂春日暄揚
華發色榮鏡天梅始萼柳始娟青山綠野懷新妍肅
龍駕建星旂

皇儀奕壽萬年清暉朗照彌八埏噓吸元氣闔天門
日月出入神化甄

淥水曲第六

天河清且淺春江澹以淥

鳳舸天上來江波動春旭日霽漱初明雨餘山更淑
遵渚漾微風乘漪沿岸曲麥氣遠浮青萬井耕犁足
天和物自熙如膏勝珠玉

登名山第七

宸遊光出震裒對邁升中周遊覽南紀登望展

天容千尋排舞鳳萬疊護蟠龍不究山川理焉知地
軸東吳雲捧日來曉氣迎瞳矐

天文五色華照爛雲中峯江垂與海壖歷歷聞呼嵩

芳樹第八

芳樹挺江南迎春發華葉豐翹被遠揚跼萼何稠疊
因風送微音芳氣自相接焉得移中林託根萃與蕞
幸成風雨和復荷

天心愜欣榮草木私嘉會

堯廷蒞

吳趨第九

吳趨稱巨麗今古艷繁華戶擁千金勢門通萬里槎
閭閻旣流溢山水亦清嘉省方奉

宸遊歡聲徹天涯連棹胥江渚方駕靈巖阿魚鳥來
相親瞻就情若何

皇慈殷鞠育

聖澤流滂沱元化疇能名一氣

天人和

濟濟第十

嘯蘭汎蕙發秀芳桐生氣變開春陽開春陽治明堂
羣彥濟濟彬含章羽爲儀來集翔噉音六六鳴歸昌
山有木石有玉爰伐豫章薦荆璞維
國光生多士左右趨維

君子使樂育材樂無已於萬斯年奉

天子

朱鷺第十一

振朱鷺考靈鼉赤羽迎春旭虹旌拂曙波海已晏河

亦清翔烏迴日馭伐鼓震天聲世和

主聖文德昌願隨丹鳳儀

廟堂

作蠶絲第十二

遵路采柔桑采柔事蠶作路遠覺行遲蠶飢嫌葉薄
食葉河沙沙盈筐紛縷縷戴月禮先蠶瞻星祠馬祖
繭大縑作絲縑密持作衣刺以雙鴛文十十五五飛
絲賤長民奢絲貴妨生計萬頃藝桑田一絲莫輕棄

觀滄海第十三

乃觀滄海滄海洋洋鑿山伐木衆力莫防於維禹績我
皇丕纘三疊滙流羣川導窾土返其宅海損其滿築
塘功成乃觀民寧海邦俾乂食

德億齡

皇猷第十四

播

皇猷惟恤民岳牧入爲股肱民隱得悉陳文武吏

賜一級遷轉宴賚各各有等倫蠲貸逋賦省歲入登
選秀士不以常格存問耆碩庶老以次

賜穀帛

皇猷播如春溫

澤必下究有過得自新億兆和樂受

天福下及昆蟲草木銜

祐恩

皇猷播

如天仁

豐年樂第十五

帝德綏和萬方節宣寒暑陰陽五風十雨有常生我
黍稷稻粱蔬茁牲肥酒香以賓以享以嘗桑麻爲服
爲裳豐年家室穰穰老幼婦子樂康

康衢謠第十六

舞康衢奏葛天鼓太和龔以軒風以形歌永言鳥翔
雲魚戲淵婦織紵男耕田出入作息樂自然舞康衢

養以軒

皇哉唐哉則象乾巍巍蕩蕩民何能名焉

迎

變祝

報闡

化詩三篇

謹序

翁方綱

皇帝御極之三十年春恭奉

皇太后安輿載舉

巡典

懿祐所燭

帝光所被豐融赫眎烏奕乎南服維時百靈叶應光

人豫順江南北浙東西淪膏浹肌式歌式舞

臣

謹按頌紀哀時之對雅歌天保孔固典述修禮

器同律度咸並著於詩書其合德一焉蓋希光

望澤者下土之孚也集禧延祥者景命之鑠也

行慶施惠者政化之實也篤上下之祉協天人

之符備稽竹素顯懿休烈於

今臻極矣臣幸得備員詞館重以恭膺

恩命視學粵東未得趨與扈從之末夙夜瞻

天如依

輦路謹撰迎

鑒祝

嘏闡

化之詩凡三篇二十七章勉冀殫竭愚忱敬揚

聖天子孝治光輝仁滂恩洽之盛於萬一其辭曰
迎

和鑾鏘六飛鳴仁聲出

帝畿霽日載暉膏露載霏握璇運璣辰拱星依靄動
雲施嚶嚶熙熙惠南國嘉師以式九圍以養以綏維
春之祺一章

玉鑾秋秋于海于岱日觀翠氣來迂瑞靄鄒魯慶雲
來扶芝蓋東蒙鳧嶧夾峙拱戴千品萬官載宣載采

箕迎畢萃風舒雨沛泱泱藹藹載指吳會載怙江介

震疊乎時邁

二章

聖人出萬物覩矧大江之南飲食歌舞屢

聖仁是溥屢

聖澤是溥長我禾黍富我桑苧父我商旅穀我士女
行而待煦仰而待雨率儔偕侶室家笑語稽首頓首
于場于墅村醪社鼓孰不日夜以佇

三章

玉鑾鳴諧萬邦于山于川于吳江浙江醴泉導艘靈

岫列窓

天光併幃春如化工瀑垂玉虹屏削玉蓉泉湧淵重
岫轉雲從萬源朝宗萬峯呼嵩萬民熙于中

玉鑾離離載路皆

皇風

四章

大吏述所司小吏謹所司爾粟爾絲無欺無私宣我
皇之施

皇勤于咨小大稽首來瞻來依依

皇之視俾庶民受釐俾庶績維熙庶徵以時庶祐旣
敘慰我烝黎照我茅茨

五章

環

輦路獻樂歌樂傾葵詠菁我有鸞依山有鳳來柯其
舞如干其音如珂其羽其葩耀如春華或集于江沱
或儀於水涯若鳴簫吹葭和

帝歌之卷阿應

玉鑾之和和聲應于萬家

六章

江南樂樂

聖人之來先我以春風拂我萌
靡我寸草有暉我良苗有懷我
原莓莓我柳我梅有迎歲而開
有披雪而芽有蔚如瑰有芬如醅
春花勿飛春鷗方階我民樂

孔皆 七章

和鑾來矣旣多受祉水秧綠只
岸則有芷泮芹翠只澤則有芑
禾麥薿薿農有耒耜葭葦瀾瀾
漁有鱣鯉士載謳歆工載筐篚
戶闔入荒湖山千里紆

天眷之視求

天顏之喜

八章

吳江榜越江湖徹歡聲叶咸韶自藩屏暨庶僚暨黃
髮逮鄙海之溼山之椒光天下環

恩膏薰吹琴霸團霄川縣長岳岵巖合萬福集江臯
敬矢歌附衢謠

九章

右迎

和鑾九章

祝

聖嘏

孝德純耀鈎鈐麗

紫宸

皇化載揚

慈祐載申

慈雲

聖日照吳越萬民俾吳越萬民頤壽永臻以戴于

一人一章

扶

安輿出

天閭律應木德載啟青陽順時飛翼萬物其昌融風
條風仁惠肆鵠春燈延暉里鼓迎暘九陌煒煌九衢
樂康九鴈春聲望杏而吹香叶

帝德之休祥

二章

蒙陰之雪徂徠之松靈巘峯律泉林鬱蔥齊烟九點

仙壺三峯

帝車當中如羲陽照東拱

福極于

璇宮海之淵沖岡之景從叶萬姓從風占萬福攸同
三章

聖祐暢于吳甸溥彼閭閻于澤于岸風之初扇川之
方渙綠楊如線玉梅如霰虎邱夾磧駕湖澄練明聖
綠漫天作

行殿兩峯雲縵六橋樹蔭九華日煥九光霞燦千里
若几案供

聖人之視膳

四章

斟汎泉于山掇嘉泉于水山爲蓬爲菰水爲膏爲醴
珍禽爲筯絃靈芝爲甘旨有瑤草銜鶴有綠蒲依鯉
璇星降於花甘露承於華鳳桐千仞鸞篁萬尾祥烟
戢香彤雲斐疊沐

日月光以奉

介祉 五章

自天降穰其雲油油花雨五色潤我秧疇鳴機月夜
焙茶巖幽煮鹽煮繭貽來及牟以我種稂爲雲霞載
輶以我笑語爲鼓吹送舟和擊壤而謳酌衢尊而酬
香花頂祝襁負而嬉遊

天光煦哉爲我民少留 六章

聖德之流行良時坎渟

聖性之粹精天開日晶具區萬頃不虧不盈天平萬

笏來朝來迎襄外湖之波澄蘇白隄之花明萬彙咸
亨萬物向榮

高厚普照

仁知合并巍巍煥乎咸慶於

昇平 七章

帝錫載歌翳江山之秀

錫民之極對時之茂時物熙熙咸納於

在宥俾叶於解阜俾昌俾富襟流帶山與

奎文齊壽隨

天聲所扣萬景輻輳實

涉鈞溥覆實孔固單厚

八章

皇闡

天符法

天運旋以奉

慈豫惟百度是宣

皇康民功躋民仁壽以廣

慈澤惟百祿是受

慈福光被於九垓八埏

聖孝篤祐於億載萬年

九章

右祝

聖嘏九章

闌

聖化調六幕答

帝心求民莫粵歲協洽暨歲赤奮若暨歲敦牂屢南

邦是度相其川澤籌其耕作我芟我柞我又我穫咸
宵旰斟酌咸

經綸昭灼霑飫闔樂豈乎無有垠塹一章

大海蕩蕩水則歸之高山峩峩岫則依之

皇風皞皞我庶民徠之

履畿輔矣訓毗晦矣逮齊魯矣春膏覲土矣

厘省補矣蕃

賚予矣

德施溥矣燭寰宇矣

二章

賜歲賦免額征遍江垓渥江城優船丁惠農氓催科
息穀價平困有糶戶有杭陸禾黍水芡菱嘉穀熟嘉
魚烝力春耕慶秋登萬萬家旨且盈歌豈弟樂阜成
三章

百僚翼翼襄此南國

皇曰敬哉各奮爾職吏之廉其覈吏之勤其覈庶司
維則庶獄維直而耕而織而籌衣食民志無有抑民

功無有斁虔其於黜陟永受多福

四章

滋液既滂鞠謀既臧士女拜叩於城於鄉有兒其齒
有髮垂黃皤皤老跪於路旁既多壽矣沐
化日之長

皇曰嘉哉益爾熾昌錫爾弗祿惟

璇極之祥飲食壽康布

慈祐於萬方

五章

旒僊其士樂我泮林

帝親採之听鼓揚其音有藻有芹有笙有琴肅肅愔愔
各奏爾能而懷誠心厥作獻琛厥琅玕球琳惟箭
惟金惟

睿鑒高深惟

帝光之照臨

六章

前歲

天筆勒於海門增輦柴塘以衛黎元曰尖山塔山曰
中小鹽

帝親度之往復討論下布石簍碑固隄根立標於沙
以誌簍痕剔髮

熟籌遠謀是存旣築旣堅俾久俾安於奠於刊是諏
是虔欽茲

巡功川瀆皆

仁恩 七章

畫省三農

父儆百工

批答章封

乙夜愍衷協六律六同闢四目四聰奉三以公執兩
以中官奏民庸詩陳民風熙熙雖雖

帝勤時功萬姓喁喁咸慶於恭逢

八章

帝挹南斗式闡優渥下指南紀惟斯民是覺注江導
川徧河喬嶽百神百祿式我赫濯萬物由庚履禮豫
樂務本務勤敦俗還樸夏諺豳歌鏘徵奏角

小臣

矢

詩敬效揚摧

九章

右闡

聖化九章

皇上六旬萬壽雅二十章

謹序

劉統勲

皇上御宇之三十有五載醲化四蒸百物昌遂殊庥

茂祉從集紛綸粵在仲秋月恭遇

聖齡周甲之慶逾歲履長又值

聖母八十晉表

景貺循環與天無極我

皇上擴

孝禧推

慈福先於歲之上章免庸租以劭農展蔬榜以舉士
延洪錫羨九賓布驪自班僚以逮衆疇懷生含
識之倫罔不延企蹈舞晞風喁喁冀獻厥悃
皇上履盛執謙先布

渙號凡稠文縉儀申請再三却而未俞將俟越歲駢
合中外歡忱晉祝

彤闥懋昭慶渥至矣哉

純德之迪蕃釐之臻簡牒罕覯也

臣

伏考古者頌禱

之作起於華封人之祝堯至形爲詠歌播之金石則自三百篇始天保六章世所稱九如之祝也他若假樂卷阿諸什保佑天申彌性純嘏惓惓忠愛之情溢於聲韻讀者猶想見當時泰交之美而孔子刪詩分列之大小雅大序謂雅者正也言天下之事形四方之風故謂之雅方今

聖天子湛仁匝洽頌烈鋪聞翕召祥和上邕下沂

隆運之昭登超軼前古允宜雍容掄揚備摛休美以

垂示來許

臣

奉職

綸扉久侍

禁近欣忭之私弗能自己輒忘其愚陋依古作雅詩

二十章拜手稽首以獻

維穹則清維宇則寧維

聖人一之以久道化成

聖人之出撫育萬國粵歲幹在庚庶物堅實粵歲支
在寅人統肇達三元相循六甲受秩俾熾俾昌誕以
開我

聖節

右

聖人出一章章十四句

卿雲糾縵爰開璇居

帝奉

慈聖穆穆愉愉越歲重光維

慈聖之慶

寶冊玉相

袞龍僕肅將

天申錫无疆歲習厥祥旣集

帝嘏亦篤

慈祐如珠之聯如環之旋繩繩綿綿欲至於萬年

右奉

慈聖一章章十六句

於昭

泰元我

皇所則

瑤壇戢戢昭事醴格普淖告虔薦之以明德匪惟薦

之實孚貫之惟

天難謐默契於

帝心

帝心允恭庶徵協從肆一日二日勅時天工肆健行
不息姬茲

昊穹

右則

泰元一章章十六句

皇矣

列聖有典有訓有聲通駿實佑啟我

皇成憲是柄

皇纘

前武式揚式觀惟

聖德是運惟

聖功是奮惟

聖學是進既推繹之復光澤之昭哉嗣服下土式之

右纘

前武一章章十四句

皇帝行政如乾運斗大公至信執樞持紐弗俟事集

先幾立剖兢兢業業自朝至於日酉康功田功庶廣
庶獄暨東西朔南罔弗涵育如春之溫如秋之肅如
日月之照臨靡隱靡伏如風之動靡不從予欲

右

乾運斗一章章十八句

疇威之董疇福之寵詎威福之作

皇無私是奉百辟卿士進於

天子

天子命官因材任使疇若是喉舌疇若是股肱疇若是舟楫疇若是干城明明

大訓式示在廷百僚咸秩以佐治平

右百僚秩一章章十六句

芸芸兆姓託命

元后我

皇恧民依旣康旣阜罔一夫不獲降澤孔厚士謳而絃眊力而耨太和所蒸世多耆耇

帝光天之下至於海隅有壤在路有尊在衢春臺之
樂與萬物俱

右

億民依一章章十六句

既生知止既典學止既日新時敏昭先覺止

萬幾之餘義圖禹書百家諸氏罔弗貫疏如金就范
如水歸壚

皇定史評莫贊一詞爰及珉碣亦考訂弗遺天縱

聖人光於文思

右

光文思一章章十六句

帝訓之宣典謨所傳

帝歌之作風雅所託

宸翰四布奕奕煌煌在穹碑嵯峨在金匱琳瑯鈞韶
之音慶禱之光日月星辰煥乎文章匪文章是名伊
性道是形

右

宸翰布一章章十四句

魏魏道統紹彼尼山

帝心一揆實右序斯文曰道德仁義匪

宣聖不尊新廟旣作旣告棟隆璘玢彝器傳於姬宗

肅肅雍雍

帝親奠於廟有碣於庭有榜於楹闡揚聖奧契之以
誠惟心法治法我

至人是并

右

道統紹一章章十八句

赫赫

皇武莫敢或不龔

天弧所指迅奏膚功肇徂征金川定祚收邛繼掃伊犁花門來同遂開疆拓宇奄有大蒙亶及炎陬共懾軍容

皇帝曰咨憫我南師我武旣揚歸自瘴鄉肆
天心協應篤祐孔長

右

皇武赫一章章十八句

皇舉時巡往省觀於下民法彼斗車牧茲兆人度方
展義旣躬旣親

翠華所屆必路萬拜自東南

四幸及彼嵩岱一豫一遊若時雨霈惟

聖人恩惟

聖母惠惟民寧之求以厥澤訖罔外

右

翠華屈一章章十六句

東溟洋洋河淮湯湯有隄有塘爰及諸淀亦有巨防
我

皇勤治水相度具詳築之槌之剔之湔之渫之宣之
水府脩矣

皇仁流矣爾居爾衛惟民其莫麗爾疇爾蓺惟民其
康乂

右水府脩一章章十六句

四瀛來附遠人祈祈謂中國有

至仁尙弗予遺內面向風維

皇所覆

皇綏柔九域視茲戶牖有梯有航是享是王獻其名
珍寶象文駟盥伊膜拜覲於

聖君曰警我

帝威曰景我

帝輝

右四瀛來一章章十六句

濟濟元會萬邦所覩內惟百官外九賓侶曙光初曦
祥飈翕舉肇六靈告祥庶徵卽敘龍旂翩翩伐鼓鼙
鼙在公錫燕逮於班聯禮盛樂殷泰和綢繆小大稽
首

天子萬春

右

元會燕一章章十六句

自

天降康曰康年頻仍華黍在隴嘉禾在塋三登九登
民盈國盈

帝徧賜蠲租俾益厚厥生言宅爾宅言田爾田自我
免漕於今五年

溫詔載宣復爾緡錢茲惟答貺於

天茲惟藏富於民茲惟迓福於

慈仁

右

賜蠲租一章章十七句

思樂士林雲霞蔚起

帝壽考作人特科載啟有賢斯興有才斯程禮門宏
開載陟載登多士蒸蒸協吉於彙征

孝禧所被文治逾昭明汝育汝造率

天子之教汝庸汝揚觀

天子之光

右士林樂一章章十六句

津門之墟上應析木醞清河到海衆流洄洑川祇効

靈厥襄孔沃

皇奉

璇闥行慶敷福有倬其塗左右趨之有平者鱸黃鱗

扶之藹藹春暉皞皞羣黎嵩呼繞

蹕千唱萬隨

慈雲之覆

聖澤之施于胥樂兮永被於

皇之釐

右津門慶一章章二十句

維極在南維月在橘

萬壽維祺芝檢晉秩

天心興心雷動懽悅川珍嶽貢思陳思謁

皇帝撫謙明詔諄切繁實政是崇詎侈於備物舞場
唄壇亦弗張設惟嗣歲履長普天慶溢

躬率臣工以助舉爵臚歡

璇幄厥誠詎莫達

右下

謙詔一章章二十句

帝圖之昌

帝化之光

帝祚之長鳳文麟趾長發其祥勅幾凝命釗孝崇敬
以篤瑞應以佑我

聖母享億萬載壽用康我

聖皇丕祉誕受襲履珍符匹覆載悠久

右

帝圖昌一章章十四句

皇太后八旬萬壽樂府九章

謹序

錢陳羣

臣謹案帝王世紀自妊娠附寶胎炎孕黃至女
節景僕實生少昊顓頊誕育伊耆厥有慶都是
以五帝三王壽皆千萬惟天地母生天地主壽
世壽民均禧衍慶有自來矣欽惟

聖母皇太后慈覆萬有母育羣生福備箕疇化隆熙
皞我

皇上以天下養而孝道昭合萬國歡而孝治大乃益
仰體

慈仁恩覃錫類內而臣工耆庶暨外藩部落莫不躋
之仁壽之域納諸福祿之林古泰上成鳩之道
周洎徧照萬年一範莫盛於茲臣於辛巳面
闕呼嵩蒙

恩賜杖獲與九老高會閱今十年恭遇

慈壽八旬駢算彙錄增熾而昌諸福之臻無不備至

臣以耄耄餘齡躬申祝

嘏葵藿之私曷勝榮幸臣惟

聖母德厚載福雖詩書所載有莘有娥誕啟夏商姜
嫄任姒徽音周室未足方比史稱福壽隆貴訓
流國闡如漢明德宋宣仁又何述焉臣陳羣奏
陋不文敬陳我

皇上延洪錫羨推本

璇闈臚次崖畧擬成樂府九章竊附衢謠以當華祝
云爾

天眷佑我清篤生

聖母誕毓

聖主延期流祚輦億載丕基爲坤維第一

體太乙運大鈞鎔蒼昊配紫旻襲氣母揖殊仁嫗掩
百族子兆民

宮中化而柔雍儀々天下以式型內壅鴻基外懷異
域咸抒誠覆露普汜品物元亨蠓飛蠕動跂行喙息
以時仰德而生至哉坤維固且寧富媪蕃釐翊

永清

右坤維一章十八句

黃帝紀元起辛卯

慈禧

鳳紀週甲而遇爲泰元貞符第二

惟泰元肇萬紀協貞符應昌期

叶

歲在重光日壬癸

冬爲安寧元下起璇籥葭飛玉琯迴

圓壇蒼壁烟霏霏

叶

光景披祥霽虹噴如川之至莫

不增增受神筴周復始

天開景祚祚

天子拜泰一上

文母

叶

右泰元貞符一章十四句

天行奉

慈輦所至仁周恩洽爲

德車至第三

大安輦金根車

至尊陪侍六龍輿手掖

鸞衡行衙衙

音魚

羽蓋華蚤前後趨春夏蘭館籞宿秋

冬饗飲校獵按時溫清怡以愉巡狩四郊存見耆老

寡孤所過勞軍減役徧問守臣治狀賢不

叶

遂東至

遼左西登五臺

叶

南逾大江北過灤水中歷嵩少聞

三呼聞三呼千萬載奉

慈娛

右

德車至一章二十句

歲遇田禾待澤

密禱宮中甘露旋應爲嘉澍應第四

自我天覆雲之油油祥應將至協氣旁流氣調時豫
致此奚繇曰我

聖母璇宮步求祝先持鼎訓切劭農叶風雨順易秔

稻盈疇津莖表沃荷雷霑優非緊畿縣六幕九州膚

寸之雲曾不崇朝叶含和吐穎歲乃有秋

右嘉澍應一章二十句

春二月

上延

釐泰岱爲泰山高第五

泰山高高無極海水深深莫測天都如蓋海如帶豈
比

慈釐與

聖德我

皇孝治邁重華岱嶽春因祝

釐陟青帝承令布陽和玉女獻秀呈祥色呈祥色五
老降迎九仙翊延光勒崇垂千秋騰華照寓昇初旦
延光騰華臻孝熙陋彼金泥銀繩七十二君躅叶條
風慶煙駢駢翼翼發靈者岱含潤者瀆叶奔走

屬車各揚職用錫下民受恩福叶

慈寧顧之壽千億

右泰山高一章二十三句

秋八月土爾扈特汗渥巴錫率全部踰萬餘里
內附爲土爾扈特練第六

大海蕩蕩羣流赴之

聖德芒芒遠人慕之在昔夙沙歸炎有苗格舜珍羽
旣納白環載獻亦越漢京奇木附枝騶牙先見豈若
今茲邇臣日域逖賓月竈璫裘皮服山栖海竄莫不
均禱感和含懼革面於時準夷四衛之土爾扈特稽
首伊綿峪起舞悚息

上奉觴上

壽曰惟

聖母之德非予一人之力

右土爾扈特徠一章二十五句

諏日加上

皇太后尊號爲

萬年玉冊第七

昊蒼篤佑我

聖母誕育

聖神天下主

叶

歡臚萬國福九有朝慶鱗萃工難圖

重譯畢至狀睢盱四廂樂作兩陛趨嫌州甜雪霞爲

漿青麟作脯駝作羹

叶

重觴醴飲樂未央山莊布金

名普陀轉大法輪聲鐘螺金經葉葉鳥貝多

天降祥祉集

聖躬尊

親歸善百福宗美意延年覆載同精璆

玉冊萬年寶晉上

徽稱紀辛卯安惟敦仁祺壽攷

右

萬年玉冊一章十八句

上承

歡介祉慶詒五代爲麟趾第八

麟趾振振螭羽詵詵

慶承奕葉綿來昂

詵詵螽羽振振麟趾受

天馭穀詒孫子

歌螽羽兮歌麟趾

母京室兮超任姒俾

天潢兮多受祉

右麟趾三章章三句

壽世多老更

行慶首被渥澤爲弧南耀第九

弧南一星耀紫垣列宿之長明亢躔

聖皇御極初週綺甲亘億齡億齡萬歲奉

慈懼朝有艾福臣衢有擊壤老人暨黃耆之士鮐背
之民沐藉

舜日餐佩

堯仁錫民爵一敘黌士登朝紳遊敖嬉戲如小兒狀
者飽飫粟肉被服溫葭首再閏紀

昌運各各獻

壽朝

楓宸耆英高會列三九請歌雲爛廣星陳

右弧南耀一章十八句

皇太后八旬萬壽祝詞九章

謹序

于敏中

皇帝御寓三十六載歲在重光
夏安仲冬之月恭逢
聖母皇太后八旬萬壽
蕃禧懋臻載籍罕覩

上崇舉彝章臚懽申

殿前四日長至有事於

南郊同雲集霽兆豐彰瑞質乎禱矣越日丙辰

上奉

皇太后自

暢春園還

宮夾道跪迎者數十萬人瞻覲

慈顏囑于環祝

上躬率羣臣祇奉

玉冊玉寶加晉

徽號又越日辛酉

上詣

慈寧宮奉表慶賀禮成還

御前殿

頒詔天下泰和綢繆晴旭昭朗自在廷臣工暨致仕
耆老與嘗有位者咸拜舞

闕下而岳牧大吏則

命各率其屬叩祝治所俾伸慶忱若新舊藩衛越瀛

徼職貢諸國亦梯航麋至而土爾扈特歸順之
衆則於

山莊宴資時夙已展其忭躍之誠者也乃至子衿
胄士黔黎耆孺之倫迺企近依呼萬之聲周徹
寰宙忻喜謳歆遐邇如一臣備職禁近幸際
慶典敬惟我

聖母福德隆備邁軼邃古而溥海內外鱗集葵向之
悃積而願形諸言謹彙採輿頌擬爲祝詞九章

冀以宣達下情申揚

曼壽蹈詠

盛儀永永無極

臣

不勝鳬藻之至

廷臣祝詞

苞符啟瑞昭貺

大清衍祥集祉錫羨

慈寧惟我

聖主寅奉天經仰瞻鈎鈐朗耀樞衡鍾律肇元介景

璇庭典

寶作

冊嘉玉是程

天藻舒采吉璩環縈

安以德綏

祺維壽徵

堯趨循陔祇晉

鴻稱上善歸美積慶頌賡一十六字八八體呈闡緒

演萬疏義駢并慶叶長至添線華屏

新宮苞茂簫韶和鳴綺筵張列

壽獻升恒

上自起舞序逮孫曾五世一堂戲綵稱觥

詔下龍樓錫類紘瀛加秩悚感榮被所生凡此

慈賚

聖孝敬承盛典聿彰歡洽在廷千官嵩呼合億萬聲

外吏祝詞

蕃釐集周四字光海隅暨遐阻胥

燾函正農扈蒸和祥若暘雨

天降康告豐屢忝司牧職守土籲來朝抒悃腑
帝曰咨安汝所率爾屬臚抃舞賁

綸言醲膏普昔

帝臨遍揚詡肇并豫迄江潯會方嶽萬物覩掖

慈鑾

恩式溥今春

巡歷齊魯大門高詠紫府協

坤元衍昌緒蒙餘暉及草莽洗濯偕錫纓黼大九州

洽謹語佩

盛德馨乎鼓祝

曼羨篤

鴻祐

老人祝詞

泰階衡平當

重熙優遊

壽國遼以嬉曰耄曰耄日期頤懽愉祝

嘏扶杖來拜

恩粟帛恬養資觀光皓首邀

豐施翰林國子爵有差賢書酬志遍

賜之作朋九老肩相隨文武秩建林泉怡冠以宗藩

殿大耋廿七人壽二千躋引而申之用介

釐悉新紀歲冒萌滋我

皇軒甲周復開

聖母八袞福履綏司天衍錄帙再披循環元會

億萬斯

多士祝詞

我止晞榮樸林翹澤

壽釐光四被榮集於泮璧文人化成科啟甲乙

叶州

省上計南宮系籍雲逵共勦閭闔載闢儒林渥

天施湛露被經席岡桐萃春枝巖桂茂秋實選人更

簡掄茹拔免薪積俊民乃用章咸被

作人德

鸞旂東指

大安奉式昌平瞻詣禮器審則從周

宣聖志燹鼎允姬室

叶

雅範遞驛郵

文思契至德藹藹王多幸生

王國弗祿爾康上頌

璇極

兆民祝詞

帝光天下撫兆姓
寡與春澤熙且愉
三十載徧祀
濩推布

慈福如膏濡
振施蠲貸不踰晷
太府金錢輦以輸
與
三周旬

澤誕敷神倉玉粒
停飛芻家家高廩
萬億秭報賽擊
鼓吹笙竽

詔書重下尺一符
上供惟正悉賜復
三載乃遍周方

隅

屬車所過

恩數殊歲必三五免厥租矧由主伯及亞旅出作入
息偕其徒公堂兕觥

萬歲呼祈禔迓祚瞻

瑤樞

外藩祝詞

惟衆扎薩克列藩四十九蒙被

懷撫恩封爵循世守準部旣歸服回城踵其後臣僕
一體聯執役效奔走茲逢

國大慶鱗集依

闕右舞蹈隨羣工膜拜咸額手僉言樸無文致祝述
所有天山高且長竊擬如岡阜譬彼恒河沙大漠喻
廣厚載瞻西崑崙介福自

主母誠心復奚將象教願同叩莊嚴千佛閣法輪轉
悠久一佛千相光合讚

無量壽

屬國祝詞

皇仁無遠不襲棧崖槎渤來同弧南宿占光熊環會
筵舞八風海邦東拓箕封扶桑大小球共中山風被
旂幟雲帆左海高艫竒琛錯落交犴越裳萬里途通
指南舊製仍工向日遙隨北鴻蠻奴牽象當中馴姿
金絡玲瓏屹如山立龍從金冠擁扇搖紅
慶辰大會庭充鈞韶天上和融凡履地而戴穹鸛羅

鯀會何隆稽首共祝

延洪如岱恒華衡嵩四裔被德無窮

新附祝詞

土爾扈特亦準部曩爲四衛拉特之一勢力均入俄
羅斯越七葉遊牧遐阻額濟勒之河濱台吉渥巴錫
企慕心懷

仁率衆十萬戶敏關籲來臣不招而致實歸順

上鑒誠悃撫納安遠人

優恤靡弗至

壽度靡弗勤餒者以飽凍者溫財費奚靳數億緡掄
彼部長使入

覲授餐乘傳王道遵伊綿之峪會極是循

避暑之莊式宴以欣

錫爵渥被賚子厚

躬自慰問忭感真會逢

慈慶開八旬駢闐效頌聯其羣吾儕歲月荷

恩賜願合諸部林總之數上爲

聖壽臻敬惟

鴻文煦誨示無極逮我子孫世世歌祝忱常伸

衛童祝詞

蕩蕩由庚醲化滂矣

慶儀豐洪集萬方矣春臺湛湛會熙穰矣仙都景融
侔揣彰矣眎彼蓬壺羅瀛滄矣丹臺巍巍絳金堂矣
琪花碧樹榮芝房矣閶風曾城奏八琅矣佺羨翩跹

奉霞觴矣諸福畢臻獻嘉祥矣曼衍魚龍百戲張矣
詠蕩西華啟

天閭矣高粱之源玉河長矣

蘭舟旣艤

鳳輦翔矣

龍袞導行典輝煌矣葆羽苓麗紉縵光矣綺陌錦闥
盆臚香矣繫予羣童衢遊康矣瞻仰抃呀頌聲洋矣
前旬之祝聽述詳矣今茲目覩喜倍常矣迨予壯耄

祝無疆矣